

近代筆記果報叢錄之一

曲園筆記

上海佛學書局印行

近代筆記果報叢錄

(一) 近代筆記果報叢錄

民國二十年四月初版一千冊

近代筆記果報叢錄曲園筆記

◎ 每冊定價大洋一角

(一) 上海開北新民國路國慶路口

(發行者)

佛學書局

(二) 上海北火車站寶山路口

如欲重印歡迎代辦

(印刷者)

國光印書局

上海新大沽路南成都路口

電話三三七四三號

△弁言▽

俞樾字蔭甫。別號曲園居士。浙之德清縣人。晚清經學家也。道光庚戌科進士。授翰苑編修。督學河南。解組歸來。絕意仕進。寄跡西湖。掌教詒經精舍。課育士人。門牆桃李。一時稱盛。居士生平。殫精著述。詩文雜集。凡成書數百卷。晚年築室湖上。博徵時聞。彙撰成帙。都十六卷。曰右台仙館筆記。因所居以立名也。其書詠奇怪異。不啻千寶搜神。特其所錄果報各則。多咸同光緒時人近事。時劫去今非遙。姓氏里居可證。非嚮壁虛構者所可同日而語。爰爲別輯成冊。名曰曲園筆記。列入近代筆記果報叢錄。深願讀此篇者。鑒於前人之食福受禍。深信因果之理。咸各致力於敦倫盡分戒淫斷殺之行。務求盡其所以爲人之道。則人生本具福樂。定可隨願而至。大心之士。由是而更能研窮佛理。發願求生阿彌陀佛極樂世界。出世之勝。因以成。他生之苦。果自免。善哉。丁福保居士之言曰。學佛之士。首以篤信因果爲要。夫因果事理。易知易見。篤信躬踐。實爲難耳。吾人應共服膺斯言。民國二十年季春之月。編者識於海上佛學書局。

RWT69%

394987

曲園筆記

FUDAN

JE2000052533H 復旦圖書館

德清俞樾曲園原著

△馮孝子。佚其名。太倉州之老閘鎮人。少孤貧。傭耕以養母。亂後無田可耕。乃行乞於市。得錢則市酒肉以進。而歌俚曲以侑之。同治六年。母卒。乞得義塚地。并其父柩合葬之。日則仍出行乞。夕即於墓旁宿焉。每日必攜數石以歸。環墓成垣。自結草廬寢處其下。後數年。無病卒。鄉人即葬之於其所廬處。知州方公傳書立碣表之曰馮孝子墓。春秋二百四十年。人材極盛。而開卷即載穎考叔事。表純孝也。余研經餘暇。偶掇拾見聞。成斯筆記。而首以馮孝子事。亦庶幾左氏之義夫。

△木工陶某。金陵人。年甫四歲。值洪楊陷城。父爲所擄。母子相依。幸而無恙。大亂既平。仍設肆於城中。至同治甲戌。陶年二十五矣。忽有老翁攜瞽婦至門乞食。與之錢不去。熟視陶曰。爾非陶姓乳名某者乎。陶問何以知我。翁曰。爾乃吾子也。陶呼母出視。果其父。因扶之入。拜問由來。則始而被擄北行。後又流轉至川陝。今自陝歸也。解腰纏出銀數錠。皆累年貿易所得。恐途中遇盜賊。僞爲寡人耳。瞽婦則其續娶者也。

因大歡慰。親黨畢賀。夫兵亂以來。父子夫妻離散者多矣。此家乃得完聚。意其有陰德乎。

△邢阿金。農家女也。幼隨其母往來大家。故有大家風範。修眉纖趾。望之楚楚。烹飪縫紉。並皆精妙。誦唐人小詩。略能上口。年及笄。嫁田舍兒。性粗暴。以其荏弱。不任井臼。虐遇之。阿金性柔和。惟背人啜泣而已。其母聞之。大感。以錢贖之。歸。又嫁一富家子。年少美丰儀。阿金自幸。以爲得佳壻也。不意其佻達無度。得新棄舊。旋即仳離。乃嫁一官人爲妾。又不容於大婦而歸。於是阿金年亦二十外矣。有黃大令者。年逾周甲。得之爲筵室。甚嬖之。黃妻久卒。謀以爲妻。阿金不可。曰。妾出身微賤。豈足伉儷。君子不獨損折年壽。亦且累君盛德。黃鑒其誠。益愛重之。黃有子婦。與年相若。阿金待之極有恩禮。子婦承翁意。事之如姑。阿金雖謙不敢當。然子婦執禮不衰。無何黃病。阿金侍湯藥惟謹。年餘黃卒。竟仰藥以殉。黃之子。感其殉父。附葬如禮焉。此女四易所天。不爲貞。卒殉其夫。不得不謂之烈。使其初適。卽得良輿。必爲善婦。乃所如不合。遂歷四姓。卒成大節。是謂質美而未學。君子哀其遇可也。取其晚蓋可也。若豫讓衆

人國士之言。本非正論。固非女子所得藉口矣。

△江西玉山縣有水南寺。亦古刹也。有老僧曰月印。年六十餘。終日坐一室誦經。足不出戶。戒行頗高。畜一狗。十許年矣。每月印誦經。狗必往聽。一聞木魚聲。輒搖尾而至。僧俗咸歎異焉。後其狗忽病癩。皮毛脫落。且有穢氣。然每日聽經如故。一日。月印忽謂其徒曰。此狗可厭。汝曹可牽出撲殺之。其徒咸駭然。罔測其意。以師素嚴重。不敢違。姑呼狗出。禁勿使聽經。實未忍殺之也。越三日。狗又乘閒來聽誦經。月印見之。驚曰。汝曹未殺此犬乎。殆矣殆矣。命其徒至某村某姓家探問。則有一婦坐蓐。三日未產。其勢垂危。乳醫束手。月印乃曰。汝曹不忍殺此犬。乃忍殺彼婦乎。此犬不死。彼婦不產。乃命其徒立時撲殺之。再偵之某姓家。則已產矣。男也。月印曰。此犬以聽經善果。得託生爲某姓男子。小有祿位。吾不及見矣。汝曹識之。及某氏子稍長。輒來寺中。依依不去。月印摩其頂曰。汝不昧宿根。此意甚善。但尙有小富貴未享。勿遽來此也。某氏子後果膺微秩。其家亦有中人之產。晚歲家居。恆寄宿寺中。時月印圓寂久矣。爲葺治其塔。寺中屋傾圯。亦出貲修理之。并買田供常住費。年七十餘而終。

△維揚李氏婦。早寡。以紡績自給。有子甫九齡。同邑富人某。豔其色。而無以自通。乃重賂其鄰。使爲閒。會其子將出就傅。鄰人以告某曰。是有機可圖也。乃築精舍于其旁側。移子弟於其中。延師課讀。宣言曰。欲入塾者。勿拒。使鄰人以告婦。極言其便。婦乃使子往讀。某善遇之。頻以飲食餽遺。一日。出十數金相贈。曰。聞子家徒四壁。願以此少佐饘粥。子持歸白母。婦曰。幣重言甘。得毋誘我乎。乃使其子往謝曰。極感長者厚意。母當踵門拜謝。某則大喜。又使其子出金還之。曰。母性多疑。此不敢受。某又爽然若失。子歸備言其狀。婦歎曰。是可得其情矣。明日戒子勿往。某自來招之。婦使其子謝曰。子之惠愈厚。子之過愈大矣。絕子所以報子也。某慚而退。此婦不特以禮自持。其智識亦足多矣。

△殷懷鄉。江浦人。少孤。有母及諸弟。無恆產。傭力以養。耕作之暇。輒入山刈薪。至夜分始休。明旦入市。易甘脆奉母。日以爲常。年三十始娶婦。教之事姑。婦亦婉婉聽從。無何歲大荒。無所得食。乃謂婦曰。俱死無益。不如嫁汝。得銀錢可以養吾母及吾弟。汝亦得生路。一舉而兩利也。婦不可。殷曰。此吾意也。非汝負我。且吾母得存活。卽汝

所以報我也。婦乃從之母及弟。卒賴以全。後母死。負土成墳。諸弟成立。皆爲婚娶。或勸續娶。泣曰。吾婦歸我。無失德。且得母歡心。昔以貧故棄之。今復娶。是負吾賢婦也。卒不娶。獨廬於墓側以終。按陳書徐陵弟孝克。當侯景之亂。京師大飢。賣妻臧氏與孔景行。以其貲養母。是鬻妻養母。古人有行之者。然郭巨埋兒。論者謂不可爲訓。然則鬻妻養母。於義似亦未安也。或曰。是蓋舍其輕且小者。全其重且大者。然此婦既得姑歡心。或母知婦見出以己之故。涕泣不食。則去婦而轉不足以養母。又或婦守從一之義。知事難兩全。慷慨自殺。則未能養母而適以殺婦。且歲飢乏食。非如水火盜賊之變。起猝然者也。委曲圖全。豈遂乏術。而計必出此乎。殷委巷細民。未聞大道。能割愛爲此。亦復大難。然以事而論。則徐孝克與郭巨。同一不可爲訓者也。

△阿勝。廣州人。談者逸其姓氏。少孤。游於美利加國之舊金山。善貿易。居六載。積貲頗豐。航海而歸。將締婚於中土。有某氏女及笄。因媒合之。女母聞其豐於貲也。許焉。既又懼其仍遠游也。曰。吾女豈能相從於海外哉。故使媒妁索重聘。阿勝鄙之。曰。賣婚非禮也。吾何患無妻。遂已其事。復游金山。女聞之。不直其母。竊附海舶至金山。尋

夫一日於途中遇之。連呼曰。阿勝阿勝。勝顧之驚曰。卿閨中弱質。何爲至此。女具告之。勝感其義。與俱歸。旅舍成禮焉。論者謂女子在室。從父母之命。此女不從母命。而從六禮未備之夫。不可爲訓。然重洋睽隔。萬里追尋。亦不可云非奇女子矣。君子姑取其從一之貞。勿責其越禮也。

△朱了頭者。婁縣農家子也。家本赤貧。又癯癯無所依。日行乞於市。咸豐辛酉歲。賊寇自嘉善趨楓涇。遇之。劫與俱去。朱曰。我丐也。既無錢財自贖。又無一藝可供爾用。何劫我爲。賊曰。汝既丐也。饑寒之困甚矣。從我去。不憂不富貴。朱怒曰。我惟甘飢寒故丐耳。否則爲竊爲盜。胡不可乎。我不爲竊爲盜。乃從爾等作賊乎。抗聲大罵。遂見害。嗚呼。如朱了頭者。可謂有古烈士風矣。

△何明達。桂林人。商於嶺南。挾貲數千。頻年折閱。耗其大半。旅况無聊。偶作狹邪游。至一所。曰巢雲別館。有妓名翠蓮。頗楚楚有致。何流連久之。忽見一婦自簾外過。淡妝素服。丰韻天然。何見而好焉。倩翠蓮爲之先容。翠蓮曰。是必無成。問何故。曰。伊因家難。鬻身於此。有能拔出污泥中者。則委身事之。若視作路旁柳。伊不屑也。何曰。若

然此女大有志節。宜詢其顛末。乃呼問之。婦自言譚氏。夫廣西人。姓王名基。客游至此。娶妾甫兩載。因事被逮於官。非百金不能出獄。妾念夫婦之義。自鬻以拯之。夫出囹圄。妾墮火炕矣。言已泣下。何曰。爾夫與吾同鄉。吾不忍其家室流離。但不知爾夫已西歸否。曰。聞猶未也。何乃辭出。竟訪得其夫。助貲使贖婦以歸。市井細民。有此高行。雖士大夫或不及矣。

△陳朝贊。江西南安府人。談者失記其縣。家巨富。止一子。已抱孫矣。陳於生日置酒召族人共飲。語之曰。某幸藉先業。加以積累。今擁貲三十餘萬矣。多藏厚亡。非所願也。願留奇零之數以贍妻孥。其二十萬歸始祖祠中。其十萬歸支祖祠中。歲入其息。仍以三分之一歸吾子孫。恐子孫或不能守吾業。仍可藉此爲生也。其三分之二以供春秋祭祀之需。族之人冠婚喪葬。咸有助。孀者孤者。廢疾者。貧不能存者。咸有養。歸始祖祠者。徧及同族。歸支祖祠者。惟及同支。以賢且才者一人司其事。雖一隴之地。不得私鬻。卽以吾今日之言爲息壤矣。聞者咸起拜曰。盛德事也。但不知翁之子以爲何如。子亦矢言惟父命是從。議遂定。夫金穴銅山。終歸於盡。陳翁此舉。非獨高

義抑亦明智也。擁三十萬之貲於一家。不三十年必盡矣。今推之於一族。而仍使歸其所入三分之一。則是使子孫長有十萬也。老子曰。既已爲人。已愈有。既已與人。已愈多。其是之謂乎。

△貞女王蕙芳。常州人。父遭兵亂。挈家避滬濱。遂家焉。貧不能自存。乃鬻女於王姓者爲女。時女甫四歲。及長。丰姿秀麗。嫻習女紅。王頗愛之。無何王卒。其妻舊居北里。搔頭弄姿。非良婦也。攜女再嫁。女心非之。而不敢言。其後夫素有登徒子之名。見女美。屢挑之。女懼不免。於同治癸酉歲二月十二日夜縊而死。此事誘與拒兩無實迹。女雖死。不得以貞女旌。因紀大略。冀不泯耳。

△李廣元。不知其鄉里。妻早卒。遺二子。長曰上朋。年七歲。次曰上俊。三歲。李續娶鄭氏。性陰險。善蠱惑。視前妻子如仇。日加楚毒。會鄭所生子夭。謂由朋驚之使然。益虐遇之。朋竟死。俊忽得顛癩疾。忽歌忽泣。殊無人理。鄭以爲僞。試以穢物予之。食盡無難色。乃視爲廢物。亦不顧問。如是者數年。鄭死。後忽自愈。父怪之。俊泣曰。兒病僞也。非僞爲。疢疾則死。繼母手久矣。今繼母死。又察父復有憐兒意。故敢以情告也。此子

在童年卽能韜晦自全。其德慧術智過人遠矣。

△安徽玉溪口泊有礮船二。有某廣文。挈眷屬坐小船過其地。日暮泊焉。夜鼓再嚴。管帶礮船之營官。乘他船出巡。船中兵勇起意至小船行劫。持刀登其艙。廣文見盜至。大呼礮船救援。卽殺之。并及其一妻一子一女一僕。長年三老均投於水。因斷其纜。使順流而去。及營官回。見鄰舟不在。問之衆曰。已解維行矣。營官驚曰。黑夜江行。必有失事。汝曹胡不阻止。衆曰。阻而不聽也。營官見几上有翡翠條脫一事。審視卽鄰舟女子腕上物也。因亦不言。及旦鼓發响。乃告於統帶之官。捕船中兵勇。嚴鞫得實。梟其首於竿。苜蓿槃中度無長物。扁舟江上。竟占无妄之災。信乎江湖之險。不獨風波也。

△閩中黃生。富家子也。年十五六。翩翩如璧人。忽得狂疾。歌哭不倫。自食其穢。夜或縱火燒屋。家人不能防。乃於山中構屋數椽。使居之。守以健僕。久之。益憔悴無人狀。其所聘林氏女。父母欲絕其婚。女不可曰。未婚而壻膺惡疾。女之命可知矣。從一而終。萬無他議。與其老死閨中。爲父母累。不如與狂夫同處空山。猶得稍盡婦職也。父

母初不許。言之益堅。乃如其志。與壻居山。饑飽寒煖。調護維謹。一日同坐石上。忽溪中有魚躍出。長二尺許。其首類犬。夫卽取食。女力阻不聽。竟食盡。越宿病若失。翁姑聞而喜甚。迎歸成禮焉。山海經云。諸懷之水。多鮐魚。食之已狂。黃生所食。豈卽此歟。殆由林女芣苢之歌。感動幽明。故得此靈藥。非偶然也。

△太倉城北十里地曰毛市。有許姓染店。其染工皆句容溧水人。許督之嚴。每年止許一人歸。是歲應句容陸姓者歸。某工與同邑。託傳語其家。及陸返。某問家事。陸囁嚅久之曰。吾負君矣。嫂因久曠。留余共衽席。余不能拒也。某不信。陸曰。嫂脅下有兩黑子如豆大然乎。某遂無語。次日懷刃亡去。許知而追之。已附舟歸矣。某抵家叩門。婦出。刃之斃。卽至婦翁家言狀。婦翁大駭。偕其子同往視之。則婦固無恙。問以前事。婦茫然曰。吾未見夫歸也。相與駭異。忽見所奉觀音像有刀痕數處。乃悟其故。正共羅拜。而許與陸踵至。陸力白前言之妄。蓋陸至某家。婦登梯取屋上所曝醬餉客。陸竊窺其腋。故見之也。一言之戲。幾至殺人。非菩薩慈悲。則此獄坐死者不止一人矣。

△吳璵香者。湖南沅陵士族女也。幼孤。依其舅寓居武陵。咸豐四年。洪楊至。舅家咸

避去。獨女隨其舅居危城中。城破。女謂舅速去。舅曰。若母以汝託吾。吾舍汝去。何面目見汝母地下乎。女曰。甥累舅非一日。今危急之際。豈忍復以孱軀爲舅累哉。入室雉經死。越數日。賊入其居。時方酷暑。訝其屍久而不殞。解視之。衣皆縫紉。胸前得一詩云。城破身難辱。途危志愈貞。千秋名節重。兩字死生輕。未報親君德。羞懷兒女情。願將三尺組。畢此百年身。

△蘇州袁氏女。許嫁吳氏子。未婚嫁而遇庚申之亂。兩家咸徙避。及亂定。女從父兄復還。父故業賈。復理舊業。居積頗贏。而吳氏則人亡家破。僅存老孀婦。卽女之姑也。女請於父。願適吳氏事孀姑。父不可。且謀別嫁之。女斷髮自誓。因亦不强也。同治十三年。有吳氏親串自秦中歸。言與吳氏子同被掠。轉展至江西。吳氏子於某年月日死。女聞大慟。謂父曰。今日當從兒志矣。如不許。願死之。父不得已。歸諸吳焉。此女不以貧富生死易心。可謂賢矣。

△蘇州城外有小家女。幼受某氏聘。及女長。父母俱死。獨與兄居。聞壻游蕩入於下流。心鄙之。有背盟意。乃以所積女紅貲洋錢十枚。付其兄。屬交原媒。償男氏聘幣。索

還婚書。其兄亦無賴。盡以供飲博。而僞爲婚書以給其妹。女不知也。以爲真與絕矣。示意鄰媼。使爲媒妁。遂與城中護龍街王姓者成婚。其前聘夫知女歸王氏。謀劫之以王氏有備不果。卽於其日訟於官。官鞫得實。笞其兄三百。判女仍歸前聘夫。以律以禮。固應爾也。然女之不能安其室。則可卜矣。

△金陵鄉閒有某翁者。生一子。與鄰村某氏聯姻。兵亂失其子。翁故爲行賈。因轉徙四方。收得一小兒。與其子年相若也。遂子之。而卽名以子之名。及金陵收復。翁仍行賈於外。而某氏則已歸矣。以女年長。將遣嫁。訪得某翁所在。貽書告之。翁思己子雖失。幸有養子。可以贗代真也。乃作復書。訂以是年夏秋間攜子而歸。及期果至。而故居無存。乃賃屋爲娶婦計。兩家均有成說。娶有日矣。翁之子忽歸。歸而不得其家。乃至鄰村造婦翁之門而求見。婦翁大駭。因親送至某翁家。子見父母。牽衣慟哭。翁欲不認。則真其子也。欲認之。又礙有婦翁在。乃曰。此吾兄子。非吾子也。自幼失散。彼記憶不真耳。婦翁歸而疑焉。旋偵訪得實。乃使媒氏告曰。原聘者吾壻也。他人子安得壻吾女。某翁正躊躇無計。而其養子知事且不諧於人定後。懷刃出門。突入婦翁之

家婦翁出。因左手把其袖。而右手以刃擬之。曰。爾女不我嫁。吾先殺爾及爾女。歸殺壻。吾亦自殺。四人同日死矣。婦翁見事急。請如期。曰。不能待矣。事在今夕。婦翁曰。然則當釋吾入內。略爲小女治裝。子姑小坐。婦翁既入。謀集健僕。縛而送之歸。其妻曰。非計也。如此彼不愈恨乎。吾壻吾女。終必死其手。然則奈何。妻曰。彼有假子。吾何妨有假女。乃潛自後戶送其女至其叔父家。而飾一婢居青廬中。招壻入行禮。既成婚。乃語之曰。汝不告而成婚。汝父必怒。毋遽言歸。請留此滿月。何如。喜曰。諾。婦翁使媒氏告某翁曰。爾子已壻吾女矣。爾尚有兄之子。吾亦有弟之女。再以相配可乎。翁亦喻其意。使其子爲贅壻於女之叔父之家。既滿月。婦翁擇吉日送兩壻兩女偕歸。其伉儷各相得。遂相安無事。

△桐鄉沈寶樾字茂庭。富而好施與。凡遇善事。必勇爲之。遠近有善士之名。庚申辛酉之亂。避寇遠出。其族姻從之者數十家。辛苦墊隘。卒不相舍。人尤稱焉。初無子。中年後納妾。生丈夫子二。鄰有不戒於火者。火及其閭。天反風以免。咸曰。爲善之報也。△王充論衡所謂福虛禍虛者。余雅不以爲然。夫餘殃餘慶之文。著於周易。天人相

應之理。備於春秋。苟禍福皆虛。則勸懲無寄矣。同其時適有張少渠之事。少渠名豫立。光緒元年。以縣丞奉檄與於海運之役。凡從事海運者。皆至滬濱附火輪船以行。有輪船名福星者。行有日矣。江蘇海運局之官。大半附是舟。少渠初亦預焉。適有一輪船先福星二日而首塗。少渠舍而從之。同袍之友。爭摻其袪。卒不爲留。已而少渠安抵丁沽。福星輪船竟沈於海。坐是船者皆死焉。少渠平日亦樂爲善事者也。光緒二年。少渠行年五十。乞言於余。余因言少渠行善而得福報。宜益加勉。而力闢王充之說。故掇舉其事。著於此編。

△唐西鎮勞氏。富於財。生一兒。年七八歲矣。猶口不能言。足不能步。其家剏建育嬰堂。堂成之日。兒卽能言。越二歲能行。今且讀書游泮水矣。報施之不爽如此。

△光緒丙子丁丑閒。直隸大荒。有兄嫂二人。挈其妹至天津求食。行至紫竹林。日將暮矣。有以小車載糕而鬻者。適駐其旁。嫂饑欲食。兄因出錢數十買糕。夫婦共食。而不與妹。其妹旁坐啜泣。賣糕者大不忍。乃推車就女曰。吾糕垂盡矣。所值無多。盡以乞汝。不責直也。已而三人皆食畢。兄嫂起而招妹偕行。女曰。前路茫茫。行將安往。往